

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

**PERTANYAAN : WAKTU PERTANYAAN MENTERI (MQT)**

**DARIPADA : DATO' MOHD. NIZAR BIN HAJI ZAKARIA  
[ PARIT ]**

**TARIKH : 12 NOVEMBER 2020 (KHAMIS)**

**SOALAN**

**DATO' MOHD. NIZAR BIN HAJI ZAKARIA [ PARIT ]** minta **MENTERI KESIHATAN** menyatakan apakah usaha yang telah dilaksanakan oleh Kementerian bagi menghapuskan stigma terhadap bekas pesakit COVID-19 serta apakah impak jangka masa panjang stigma ini kepada emosi individu yang terkait.

**JAWAPAN**

**Tuan Yang di-Pertua,**

1. Sepanjang tempoh wabak Covid-19 yang berlaku, Kementerian Kesihatan Malaysia (KKM) melalui **Program Kesihatan Mental Dan Sokongan Psikososial** telah melaksanakan pelbagai usaha bagi mengatasi stigma berkenaan pesakit atau bekas pesakit Covid-19 agar keadaan ini tidak menjadi fenomena yang boleh menggugat kesejahteraan emosi mereka yang berkenaan. Usaha yang dilaksanakan bertujuan meningkatkan kesedaran dalam kalangan masyarakat untuk menghindari stigma terhadap pesakit dan bekas pesakit Covid-19

2. Antara usaha yang telah dijalankan oleh KKM adalah seperti berikut:

- i. Slot penerangan di televisyen, radio serta video tentang maklumat penyebaran Virus COVID-19 serta risiko jangkitan bagi pesakit COVID-19 yang telah sembuh. Penerangan ini dilaksanakan bagi memberi kefahaman bahawa risiko jangkitan yang rendah bagi mengelak stigma terhadap pesakit dan keluarga;
- ii. Edaran infografik secara maya yang diedarkan melalui Portal Kementerian Kesihatan (KKM) serta di Facebook KKM agar masyarakat sedar dan cakna bahawa stigma boleh memudaratkan emosi seseorang yang berkaitan;
- iii. **Pelaksanaan Perkhidmatan Bantuan Talian Sokongan Psikososial Kementerian Kesihatan** dengan kerjasama agensi Kerajaan dan Pertubuhan Bukan Kerajaan (NGO) yang menjadi agen penting memberi penerangan dan pendidikan kepada pemanggil yang secara rata-ratanya memerlukan sokongan emosi akibat kebimbangan jangkitan covid-19 melalui ahli keluarga atau individu rapat yang telah disahkan positif.

- iv. **Sokongan emosi pesakit dan keluarga juga dilakukan di semua fasiliti kesihatan yang merawat pesakit COVID-19** dengan mengadakan sesi kaunseling, intervensi psikologi serta pelbagai terapi ringkas yang lain seperti terapi seni, terapi relaksasi pernafasan dan saringan kesihatan mental. Bantuan awal psikologi juga diberikan kepada individu berkaitan jika keadaan emosi mereka tidak stabil atau dalam keadaan krisis emosi.
3. Impak jangka panjang kepada individu yang mengalami kesan stigma termasuk:
- i. cenderung ke arah mengalami emosi yang mudah terganggu;
  - ii. tahap resilien yang rendah;
  - iii. sensitif;
  - iv. kurang fokus;
  - v. rasa rendah diri; dan
  - vi. menjurus kepada pelbagai isu kesihatan mental lain sehingga boleh menjejaskan fungsi kehidupan harian.
4. Keadaan ini juga secara langsung akan memberi kesan kepada kesihatan fizikal seperti kesan simptom somatik, badan berasa lemah, sakit kepala, berasa degupan jantung lebih laju dan sebagainya.

Sekian, terima kasih.

**PEMBERITAHUAN PERTANYAAN DEWAN RAKYAT  
MESYUARAT KETIGA, PENGGAL KETIGA  
PARLIMEN KEEMPAT BELAS**

---

**PERTANYAAN : WAKTU PERTANYAAN MENTERI (MQT)**

**DARIPADA : TUAN CHA KEE CHIN [ RASAH ]**

**TARIKH : 12 NOVEMBER 2020 (KHAMIS)**

**SOALAN**

**TUAN CHA KEE CHIN [ RASAH ]** minta **MENTERI ALAM SEKITAR DAN AIR** menyatakan apakah punca kepada banjir kilat yang melanda Daerah Seremban pada awal pagi 4 November 2020, dengan lebih seribu buah rumah telah ditenggelami air. Apakah perancangan dan tindakan yang bakal dijalankan oleh Jabatan Pengairan dan Saliran (JPS) agar musibah ini tidak berulang lagi.

**JAWAPAN**

**Tuan Yang Di-Pertua,**

1. Kejadian hujan lebat di Negeri Sembilan telah bermula pada jam 12.30 tengah malam 4 November 2020 di mana ia telah menyebabkan kejadian banjir kilat berlaku di beberapa kawasan di Daerah Seremban, Negeri Sembilan. Berdasarkan semakan Kementerian melalui Jabatan Pengairan dan Saliran (JPS), didapati sebanyak 775 buah rumah telah terjejas dengan kejadian banjir ini.

2. Untuk makluman Ahli Yang Berhormat, antara punca Kejadian banjir kilat ini berlaku adalah:

- i. hujan lebat yang luar biasa di Stesen Sg. Linggi, Kampung Mantau yang mencatatkan bacaan tertinggi sebanyak 155mm untuk tempoh 4 jam;
- ii. limpahan air Sg. Linggi yang melepasi tahap bahaya dengan bacaan yang dicatatkan 36.94m berbanding paras bahaya 35.3m dan melimpah ke kawasan sekitar;
- iii. masalah perparitan yang tersumbat serta air longkang di kawasan perumahan yang rendah menyebabkan aliran air tidak dapat mengalir sempurna ke longkang monsun; dan
- iv. limpahan air dari sistem peparitan disebabkan aras Sg. Linggi tinggi dan air longkang tak dapat mengalir lancar ke sungai.

3. Antara perancangan dan tindakan yang diambil oleh Kementerian Alam Sekitar dan Air dalam usaha mengurangkan keterdedahan atau risiko kepada banjir di kawasan-kawasan yang terjejas adalah Kementerian melalui Jabatan Pengairan dan Saliran (JPS) telah melaksanakan projek Pembangunan Lembangan Sungai Bersepadu (PLSB) Sungai Linggi, Fasa 4, Negeri Sembilan dengan kos peruntukan sebanyak RM70 juta. Projek PLSB Sungai Linggi Fasa 4 ini masih dalam

## **NO. SOALAN : 2**

pelaksanaan dan dijangka siap pada Mac 2022. Status kemajuan fizikal di tapak adalah 50% berbanding 49% yang dijadualkan sehingga 25 Oktober 2020.

4. Kementerian juga telah memohon projek baru di bawah RMKe-12 bagi Pembangunan Lembangan Sungai Bersepadu (PLSB) Sungai Linggi Fasa 5. PLSB Sungai Linggi Fasa 5 ini akan bermula dari Hilir Sungai Linggi di Kampung Nyatoh sehingga Pekan Mambau, Daerah Seremban dengan jajaran sepanjang lebih kurang 12 km. PLSB Sungai Linggi Fasa 5 ini mengalir melalui Pekan Mambau sehingga ke Kg.Nyatoh termasuk beberapa cabang anak sungai lain seperti Sg. Temiang, Sg. Kepayang, Sg. Kayu Ara dan beberapa anak sungai lain mengalir masuk ke Sungai Linggi.

5. Selain itu, Kementerian juga akan berkerjasama dgn pihak Pihak Berkuasa Tempatan (PBT) dalam memastikan sistem saliran dan longkang-longkang yang dibina oleh pihak PBT, diselenggara dengan baik bagi menampung air larian permukaan yang banyak mengalir dengan lancar ketika hujan lebat.

Sekian, terima kasih.

**MESYUARAT KETIGA, PENGGAL KETIGA,  
PARLIMEN KEEMPAT BELAS  
PEMBERITAHUAN PERTANYAAN  
DEWAN RAKYAT MALAYSIA**

---

**PERTANYAAN : WAKTU PERTANYAAN MENTERI**

**DARIPADA : YB TUAN AHMAD BIN HASSAN [PAPAR]**

**TARIKH : 12 NOVEMBER 2020 (KHAMIS)**

**SOALAN**

Minta **MENTERI PEMBANGUNAN LUAR BANDAR** menyatakan jumlah dan nilai bagi projek bekalan air luar bandar (BALB), projek bekalan elektrik Luar bandar (BELB) dan projek jalan luar bandar dan perhubungan desa di Sabah bagi tahun 2020, status projek dan peratusan peruntukan yang telah digunakan setakat ini.

**JAWAPAN**

**Tuan Yang-Dipertua,**

Untuk makluman Yang Berhormat, bagi pelaksanaan Projek Bekalan Air Luar Bandar (BALB) Sabah di bawah Rancangan Malaysia Ke-11 sebanyak 63 buah projek sedang dan akan dijalankan dengan kos keseluruhan adalah sebanyak RM2.04 billion. Bagi tahun 2020, sebanyak RM212,208,000.00 telah diperuntukkan dengan belanja terkini RM171,765,803.00 (80.9%). Daripada 63 buah projek tersebut, 21 projek dalam peringkat pembinaan, 38 dalam peringkat rekabentuk dan empat (4) projek telah siap.

Bagi pelaksanaan Projek Bekalan Elektrik Luar Bandar (BELB) Sabah pula, di bawah RMKe-11 sebanyak 15 projek telah diluluskan dengan kos keseluruhan adalah sebanyak RM3.06 billion. Bagi tahun 2020, sebanyak RM216,731,200.00 telah diperuntukkan dengan belanja terkini RM89,043,079.30 (41.1%). Daripada 15 buah projek

tersebut, sebanyak dua (2) projek sedang dalam peringkat pelantikan perunding kajian kesesuaian , sembilan (9) projek dalam fasa pembinaan dan empat (4) projek telah siap sepenuhnya.

Untuk makluman Yang Berhormat selanjutnya, bagi pelaksanaan Projek Jalan Luar Bandar (JALB) Sabah pula, di bawah RMKe-11 sebanyak 101 projek telah diluluskan dengan kos keseluruhan adalah sebanyak RM6.05 billion. Bagi tahun 2020, sebanyak RM271.24 juta telah diperuntukkan dengan belanja terkini RM172.48 juta (63.6%). Daripada 101 buah projek tersebut, sebanyak 18 projek sedang dalam peringkat perancangan, 22 projek dalam perlantikan perunding dan rekabentuk, tujuh (7) projek sedang dalam peringkat perolehan, 26 projek dalam pembinaan dan 28 projek telah siap sepenuhnya.

Manakala bagi Jalan Perhubungan Desa (JPD), Kementerian menerima sejumlah RM69.644 juta peruntukan bagi Projek Jalan Perhubungan Desa (JPD) Negeri Sabah bagi tahun 2020 melibatkan 278 projek. Jumlah tersebut adalah termasuk RM25 juta peruntukan yang diterima menerusi Pakej Rangsangan Ekonomi (PRE) Tahun 2020.

Setakat 30 Oktober 2020, sejumlah RM26.23 juta (37.66%) peruntukan telah dibelanjakan. 54 projek sedang di peringkat perolehan, 69 projek di peringkat pelaksanaan dan 155 projek telah siap.

Sekian, terima kasih.